

PAS persoal SPR buang 10,000 pengundi kes 'IC palsu'
The Malaysian Insider
14 September , 2011
Oleh Syed Mu'az Syed Putra

KUALA LUMPUR, 14 Sept – Dewan Pemuda PAS pusat mendakwa Suruhanjaya Pilihan Raya (SPR) telah membuang lebih 10,000 nama dalam daftar pemilih badan itu yang dikaitkan dengan kes 'MyKad' palsu dalam tempoh dua bulan lalu.

Pengerusi Pemulihan Demokrasi dan Mobilisasi Dewan Pemuda PAS pusat Suhaizan Kariat berkata, perkara itu telah dikesan pihaknya yang kini giat mengenal pasti kepincangan dalam daftar pemilih selepas isu warga negara asing didaftarkan sebagai pengundi.

Kata beliau, pihaknya telah mengenal pasti lebih 10,000 kes kad pengenalan palsu dalam daftar pemilih SPR melalui kajian dibuat, namun mendapati ia telah dibuang selepas melakukan semakan terbaru.

Tambah Suhaizan, SPR tidak mempunyai kuasa untuk membuang nama-nama dalam daftar pemilih selepas tempoh bantahan tamat walaupun terdapat keraguan.

"Kita ada rekod SPR, setiap parti politik boleh membeli maklumat daripada SPR, daripada senarai pengundi ini kajian dibuat, kita kaji yang mana kita mencari nama dan nombor kad pengenalan yang sama, hasilnya adalah apa yang kita dedahkan selama ini.

"Lebih daripada 10,000 nama telah dikeluarkan dalam tempoh dua bulan data ini dikeluarkan... peraturan mana yang SPR guna untuk buang data ini, nama-mana ini telah digazetkan... macam mana dengan mudah SPR buang, SPR sepatutnya buang sebelum ia digazetkan iaitu semasa daftar pemilih dipamerkan sekiranya ada bantahan," katanya pada sidang media di ibu pejabat PAS di sini.

Jelas beliau, terlalu mudah untuk SPR mengeluarkan data yang salah tanpa mengikut peraturan yang ditetapkan.

"Dengan mudah data dimasukkan dan dikeluarkan, apa jaminan daftar pemilih SPR ini tidak dimanipulasikan? Sebagai contoh, hari ini Pemuda PAS bantah dan nama dikeluarkan kemudian esok Pemuda Umno pula bantah, adakah data ini akan masuk balik? Kalau Pemuda PAS tak bantah 10,000 data ini tidak akan keluar, ini apa yang kita tahu yang kita tidak tahu macam mana," katanya.

Tambah Suhaizan, selain isu daftar pemilih, kerajaan perlu menjalankan siasatan ke atas Jabatan Pendaftaran Negara (JPN) berhubung mengeluarkan kad pengenalan palsu.

"Kalau daftar pemilih dalam SPR palsu bermakna ada pihak tertentu yang buat, di JPN ada kumpulan yang buat kad pengenalan palsu, kita nak kerajaan buat siasatan tentang kumpulan ini.

"Dari maklumat kita 10,000 ini adalah warganegara, kita percaya ada agenda untuk membuat kad pengenalan di peringkat JPN, JPN perlu membuat penjelasan," katanya.

Sebelum ini PAS melalui sayap pemudanya telah mendedahkan pelbagai kepincangan

pilihan raya terutamanya dalam isu daftar pemilih SPR.

Isu yang besar adalah tindakan menukar status kewarganegaraan pemastautin tetap kepada warganegara dalam tempoh yang singkat dan ia mendapat bantahan kepimpinan Pakatan Rakyat.

Bagaimanapun perkara itu dinafikan oleh JPN dan SPR.

The Malaysian Insider

Hakcipta © 2011 The Malaysian Insider

Source: <http://www.themalaysianinsider.com/bahasa/article/pas-persoal-spr-buang-10000-pengundi-kes-ic-palsu/>